

bore valerent, quàm fortissimus aliquis athleta, omnesq; senes ad juvenes collati essent egri. Quod cum sit absurdum: Medici sanitatem, & naturalem illam *συμμετρίαν* nō in puncto quodam constituunt, neq; etiam quamcunque ab exactissima *συμμετρία* declinationem morbi nomine dignantur; sed eam solū, quæ præter naturam est. Itaq; etiam si vel ratione ætatis, vel sexus, vel alius naturalis constitutionis ratione, multi eas actiones exercere non possunt, quas alii possunt: tamen quia hoc ipsis secundum naturam ipsorum non competit, hæc imbecillitas pro morbo habenda non est. Et quia hæc sanitatis latitudo ratione ætatum, sexus, & temperaturarum notatu digna & evidens est: Medici peculiariter eam considerant, & eos, qui ab optima quidem illa sanitate deflectunt, ægri tamen non sunt, Neutros appellant, & Neutram constitutionem in medio quasi sanitatis illius exactioris, & morbi constituunt.

An detur  
corpus  
neutrum.

De qua constitutione cum controversia moveri soleat: sciendū, si rem exactè æstimemus, nullam dari mediam dispositionem à sanitate & morbo specie differentem: cum omnis homo sanus sit, vel æger; actionesq; naturales exercere possit, vel non possit. Ideoq; etiam philosophus, cum actiones corporis viventis recenset, saltem sanitatem & morbum, non verò neutram constitutionem recenset. Atq; ipse Ga-

lenus, *de differentiis morborum cap. 2.* saltem sanitatis & morbi mentionem facit: & *1. de tuenda sanit. cap. 1.* duas tantū primas & maximas Medicinæ partes facit, quarum alteram sanitatis tuendæ; alteram morbi profligandi facultatem appellat. Et quamvis dentur plurimæ constitutiones, quæ ab optima sanitate declinant: tamen hæc constitutiones ab optima sanitate specie non differunt, sed majoris & minoris ratione. Ipsaq; adeo neutra constitutio ad sanitatis latitudinem pertinet. Sicut enim nivis candor ab eo, qui in lacte vel alia re est, quatenus candor, non dissidet: ita & hujus sanitas nō differt ab alteri⁹ sanitate specie, sed secundū majus & minus. Veruntamē Medici pro suo usu Neutram constitutionem peculiariter considerant, & Neutros à reliquis sanis non quidem specie, sed tamen minoris & majoris ratione distinguunt. Nam cum talium corporum non solū ratione ætatum, sed & temperaturarū & aliarum circumstantiarū ratione magna sit diversitas, atque illa omnia Medici tutelæ subiecta sint: distincta hinc oriuntur Medici officia, & Medicinæ partes, vel partium Medicinæ potius divisiones. In specie enim Medico considerandum est, qua ratione pueri, senes, convalescentes & alii gubernandi sunt. Unde Neutri statui inserviunt in primis partes Medicinæ *προφυλακική*, præservatoria; & *ἀναληπτική* instaurativa di-

B 3,

ctæ;